

四庫全書

集部

欽定四庫全書

集部

江湖小集卷七十四

詳校官中書臣張姚成

助教臣常循覆勘

覆校官主事臣龔敬身

校對官助教臣胡子襄

謄錄監生臣王時發

謄錄貢生臣李標

欽定四庫全書

江湖小集卷七十四

宋 陳起 編

高九萬菊澗小集

春日即事

人間閒日月春後乍晴陰
半夜雨聲急一谿流水深
鳥啼花自發詩就客能吟
短策西湖路幽芳信意尋

送別

老去情懷怕別離
年來不作送行詩
人前舉似終難信

問著垂楊便可知

春日北山二首

人緣白石泝清谿
手剥蒼苔認舊題
春色滿山歸不去
拆桐花裏畫眉啼

插花吹笛兩山中
桃李尊前日日同
待得馬頭飛絮滿
更來沽酒看殘紅

僧房夜坐

萬枝松裏一篝燈
知是山房第幾層
靜夜數聲清磬響

上方應有誦經僧

訪諸葛鍊師不遇

青銅留著布囊中去謁人間小卧龍
久欲共君謀一醉
有錢却又不相逢

雜興二首

新分菊本自鉏山手縛枯藤作矮闌
比似著書空用力
種花猶得一年看

二十年前欲住山不禁寂寞揜柴關
如今寂寞禁當得

欲揜柴關又却難

秋日田父辭二首

啄黍黃雞沒骨肥
繞籬綠橘綴枝垂
新釀酒旋裁衣正
是婚男嫁女時

少婦按藍旋染帚
大兒敲葛自漿巾
新摘筴欣欣相
喚相呼看賽神

孤山雪後

雪後騎驢行步遲
孤山何似灞橋時
近來行輩無和靖

見說梅花不要詩

天台曹園

蔡嶺桑麻地曹家桃李莊
谿流春水滑梅度晚風香
竹屋解畱客荀輿休做裝
平生看花法不學蜜蜂忙

西湖春雪

小艇沿湖看雪飛
正當騎馬踏春時
是誰乞與楊花舞
先占東風一月期

閑居雜興三首

開門遣蠻童買花供銅佛春風隨花來為我一披拂風
和花氣清下簾休放出回施佛因果供此老詩骨

點燈酌春酒襞紙題小詩讀盡列僊傳引調學語兒自
飲復自笑不覺春漏遲且了今日事明日還任之

杜鵑休忉忉布穀休聒聒無田不須耕無家自能活行
藏莫非時造化安可奪更放心地寬出門行路闊

春日湖上

乘興行新路凝情獨老翁馬蹄春草上人影夕陽中飛

絮沿湖白殘花染浪紅
晚歸雲氣合雙漿破空濛

春懷

江南春盡尚春寒
添盡征衣獨拚闌
日暮酒醒聞謝豹
所歡多在水雲間

過臨平

征帆一似白鷗輕
起揭船篷看曉晴
梅子著花霜壓岸
自披風帽過臨平

古廟

古廟依喬木開門對淺沙
短籬紅槿樹深徑碧苔花
屋破香煙濕庭空日脚斜
山寒無賽鼓鳴噪集神鴉

古寺

山路荒涼出小亭
土牆斑駁帶枯藤
欹斜古殿三尊佛
黯澹寒篝一點燈
碣石半磨天寶字
禪房空老政和僧
頭陀禮拜迎人說
門外浮屠欠兩層

卜居

結屋離黃道開門對白沙
一莊千古月三徑四時花
客

至旋沽酒身閑自煮茶
相聞蟲鳥外不復聽諠譁

秋日三首

旋買扁舟載一翁
片帆吹下夕陽東
西風欲織江頭錦
催染秋林葉葉紅

庭草銜秋自短長
悲蛩傳響答寒螿
豆花似解通隣好
引蔓殷勤遠過牆

獨客飄然物外遊
江南江北總宜秋
芭蕉昨夜綠何事
和雨和風作許愁

松谿廟

廟自何年立門深晝不扃寒藤扶壞壁秋草帶䟽櫺
谿接東西碧山分遠近青老巫逢客至謾說有神靈

蓮實

膩玉肌膚碧玉房纍纍波面趣紅芳坐忘佛土三生夢
來結人間一夏涼青子綻時仙掌濕綠包分處蜜脾香
尊前笑摘疇風露猶記西湖古柳傍

無題二首

獨展羅衾無夢成
寶香熏徹轉愁生
癡心不願郎思妾
只願郎今厭客情

風竹蕭蕭淡月明
孤眠真箇可憐生
不知昨夜相思夢
去到伊行是幾更

秋興

數聲新鴈夜初長
曉起開門衣袂涼
籬菊褪黃秋興嬾
瓦溝才試一痕霜

秋晚即事

江頭風葉舞低回催得濃雲頃刻開
萬里碧天紅日晚
數聲新鴈送寒來

毋自欺齋夜宴

毋自欺齋清更嚴齋中人物斗之南
七朝宰相得瞻仰
四海詩人交筴談古調喜聽琴再弄
深杯休惜酒重添
玉堂今夜無宣喚且與江湖作小叅

曉出黃山寺

曉上籃輿出寶坊野塘山路盡春光
試穿松影登平陸

已覺鐘聲在上方
草色谿流高下碧
菜花楊柳淺深黃
杖藜切莫匆匆去
有伴行春不要忙

育王寺

曉策烏藤上育王
入山隨處得徜徉
碑頭龍護先王字
塔下魚懸外國香
徧謁禪房嘗茗茗
閑聽社媪說豪光
山深日短行難盡
僧遣頭陀辦客牀

春日湖上

清波門外放船時
晝日輕寒戀客衣
花下笳聲人共語

柳邊檣影燕初飛
曉風不定棠梨瘦
夜雨相連薺麥肥
最憶故山春更好
夜來先遣夢魂歸

黃居士山房

浮利浮名心已灰
三間茅屋白雲堆
先生自釀松精酒
侍女能持藤癭杯
養鹿曉隨原草去
放猿時摘野花來
近聞身口渾無累
榭葉黃菁繞宅栽

育王寺

精籃遊歷地景物
自情親
竊引登山客
僧迎禮塔人名

花千佛供喬木萬夫身碑刻東坡作重來為拂塵

送春

韶光催去本無情祇為東君去住輕雖欲遲留芳艸夢
如何禁得杜鵑聲桐花快落春風老梅子微酸晚雨晴
從此嬉遊時節少不須日日報詩成

秋山散步

乍晴沙路軟於塵新著芒鞋更可人誰道秋山不宜客
桂花多處勝行春

即事

秋來高處不宜登，閑却西樓最上層。
讀罷黃庭牕戶晚，自敲清磬上香鐙。

烏鎮普靜寺沈休文故居也

寂寞梁朝寺，深廊十數間。
碑存知殿古，香冷覺僧殘。
斷岸舟橫浦，平坡樹補山。
休文知好在，依舊帶圍寬。

渡錢塘

小立晴江上，潮生落照邊。
晚花低映水，春草暗迷煙。
燕

子飛官驛鷗羣引客船
闊情南浦別相對獨依然

七夕

一枕新涼供醉眠
覺來風物已凄然
山雲帶雨重重合
宮樹鳴秋葉葉顛
滿進一杯醺好節
休看兩鬢換流年
雙星回施癡兒等
容我長齋綉佛前

荆棘中見梅花

荆棘叢中數點春
春雲態度月精神
依然竹屋茅櫪下
靚女盈盈不嫁人

感春

人事日紛紛不知春已分
問梅成綠葉看杏落紅雲
燕向晴空語蛙從夜靜聞
感時傷老大孤坐對鑪熏

送劉允叔主簿歸山中

浮利浮名輒不來
故山歸去恰春回
馬蘭旋摘和松鬻
枸杞新生傍菊栽
庭樹夜留山鳥宿
洞門早為野雲開
明年我亦天台去
相伴芒鞋躡古苔

江居曉詠

家住清江江上村
江雲山影自平分
幾回早起開門看
不見青山見白雲

題二小姬扇二首

慶娘顰翠眉
春瘦怯羅衣
笑問采花蝶
如何成對飛
湘湘未識羞
獨坐抱瑩篴
貪學者婆舞
擡身拜部頭

小樓雨中

雲浮江雨暗
獨坐苦淹留
白髮羞明鏡
青山對小樓
酒功書下
下心事付悠悠
安得并州剪
從頭剪斷愁

首夏

漾漾池塘碧染衣
陰陰草樹綠成圍
江村寂寞春歸後
一點楊花不見飛

寄方巖

綠髮仙人山澤癯
出遊入息幾曾拘
種花甚少四時有
諫草不多千古無
閱世眼高磨日月
好賢名重滿江湖
行藏到得無心處
鐘鼎山林豈異塗

自賦

蝸角蠅頭總是虛何須留戀市朝居老於親戚情當密
貧與公卿分合疎小澗草荒元種菊故山塵滿舊抄書
幾時歸去重料理嘯月眠雲得自如

戡山登高

醉眼橫斜看菊枝又成客裡過佳期去年行路猶持酒
今日登高懶賦詩老淚怕從衣袂見閑情但有帽簷知
阿穎故國才歸得歲歲須來舉一卮

戡婦吟二首

將身托戰爭世事百無情相對生離別渾如落葉輕
辭家出戍邊北望隔青烟怕做沙場夢秋宵不敢眠

重遊無量院

佛屋欹斜老翠微小軒猶記昔遊時江雲帶雨涼生竹
野水迎潮暗入籬門外風波僧自識山中朝暮客曾知
眼明素壁關情久十載才能寫此詩

春霽

積雨才收雲盡歸長空一色碧琉璃日移簾影臨書案

風颭綉花落硯池巢燕學飛猶戀母籠雞得食旋呼兒
眼看景物關情甚喜為新晴賦此詩

歲除登岑崆山精舍

蕭寺經行無盡情倚闌長是眼增明谿因宿雨十分急
山為凝寒一味清竹外飛花隨晚吹樹頭幽鳥試春聲
重來又是明年事臨出門猶欸欸行

張氏曲江

一曲澄江兩派分滿山修竹綠齊雲矮窻風月侵帆腹

小徑煙霞隱屐痕白鷺夜依花影宿清猿時共舫聲聞
主人與客心如水同倚闌干得細論

登九華樓

高閣臨江可契心興來時得一登臨山雲浦樹重重合
野水汀蒲日日深雅背夕陽供晚哺蟬迎涼吹試秋吟
倚闌盡見諸峰出如對風流李翰林

趙仲莊都鈴山居

一官難換北山薇結屋栽花度四時果熟不妨禽摘盡

酒香惟恐客來遲
小蘋低唱花間曲
阿廣高吟李下詩
客久辦心分半隱
尚嫌風骨欠仙姿

船戶

盡將家具載輕舟
來往長江春復秋
三世兒孫居枕尾
四方知識會沙頭
老翁曉起占風信
少婦濃妝照水流
自笑此生漂泊甚
愛渠生理付浮悠

歸寓舍

門前流水碧粼粼
歲晚歸來亦可人
梅欲開時多是雨

草才生處便成春
嬌兒對面兩癡絕
老子關情一欠伸
快取竹筩筩濁酒
舉杯先為洗京塵

憶西湖

西湖春二月結客少年遊
駿馬黃金勒長身紫綺裘
愛花論擔買嗜酒滿船浮
兩載緣何事台州又越州

小樓雨中

長安市上僦樓居
閑裏身心儘自如
十日雨聲春對酒
一窻燈影夜觀書
茶經未展愁先醒
藥錄才看病已除

所欠短欄晴景好
拆桐花月共扶疏

喜鄉友來

蕭蕭春夜雨有客渡江來
世事攢眉說鄉談信口開
晚肴供苦筍時果薦青梅
甚欲澆離恨呼鐙撥酒醅

春寒

料峭東風破客衣
春寒不比臘前時
絕憐牆角櫻桃樹
全似梅花雪後枝

昌國縣普濟寺小亭

鯨海中流地龍峰小洞天亭高先得月樹老久忘年大
士居鄰境隨僧指便船若為風浪息更結補陀緣

春情四首

樓頭上馬苦匆匆百計相留無計從正好看花郎却去
江邊春色為誰濃

天涯海角水雲寬人在吳頭楚尾間彈徹瑩篴難寄恨
海棠庭院獨凭闌

深院沈沈照落暉寶香熏徹舊時衣一春行樂誰為伴

羞見花前蛺蝶飛

鬪草歸來上玉階
香塵微浣合歡鞋
全籌贏得無人賞
依舊春愁自滿懷

晚春即事

輕烟終日鎖樓臺
細雨絲絲半濕苔
杜宇一聲青嶂外
谿流時送落花來

戢山戒珠寺王右軍故居也

葉葉東風吹客衣
昌安寺裏晚遊時
欹斜竹屋羲之宅

磨滅經幢率府碑佛化是誰留實相鵝亡猶自見方池
逢僧小作煎茶供畧問源流笑不知

冬日即事

江上凝冰約水痕門前殘雪綴溪雲杖藜獨立梅梢月
成就清寒到十分

訪鉢朴翁不遇二首

亂花飛絮趁長顏來訪西湖竹裏庵行盡白雲三十里
詩人又在白雲南

乘興尋僧入翠微
山中無限野蔷薇
主人不見從誰賞
折得繁枝自插歸

聚景園口號二首

淺碧池塘連路口
淡黃楊柳護欄牙
舊時歲歲春風裏
長見君王出看花

竹影參差臨斷岸
花陰寂歷浸清流
遊人難到闌干角
盡日垂楊蓋御舟

恭跋思陵宸翰拓本卷後

淡黃越紙打殘碑盡是先皇御賜詩白髮內人和淚讀
為曾親見寫詩時

山行即事

落盡桐花春已休過牆新竹籜初抽山行步步黃泥滑
小立谿橋聽雨鳩

又

捲地東風晚更狂櫻桃吹子落泥牆溪雲自為催詩黑
忙殺條桑窈窕娘

寄林徵君

老無閑事上雙眉，問著窮通盡不知。
兩鶴忽飛因客到，一牛方病得妻醫。
案頭幾卷陰功錄，壁上諸家勸世詩。
見說今年翁八十，鬢邊才有數莖絲。

曉行

跨馬登長路，聞雞度遠關。
水光斜漾月，雲影倒隳山。
人跡霜橋外，禽聲煙樹間。
自慚林下客，清夢未曾還。

三峯廢寺

荒林依約舊山門
秋草離離故迹存
雙瀑有聲傳宿雨
一龕無地住閒雲
蝸沿壞壁丹青古
龜負殘碑字畫昏
三嘆廢興誰可問
亂雅鳴噪自成羣

下塘

日出移船日又斜
蘆根時復見人家
水鄉占得秋多少
岸岸紅雲是蓼花

行淮

老翁八十鬢如絲
手縛黃蘆作短籬
勸客莫嗔無瓮坐

去年今日是流移

蘭亭

老來渾不愛春遊
來到蘭亭爛漫秋
亭下水非常日曲
山前竹似舊時修
二三客子因懷古
八百餘年續勝流
試與山靈論往事
不知還肯點頭不

贈丁子植撫幹

幙府歸來赴調時
清聲藉藉滿京師
真如白壁藏奇石
判得黃金博斷碑
借宅先尋籠鶴地
買盆權作養魚池

容中高致猶如此明日還山樂可知

天章寺

地勝秋清人欲仙倚闌時節月初圓不知寺在烟霞表
但覺身臨星斗邊寶墨舊歸天上去高名今向世間傳
登臨莫作匆匆會去後重來又幾年

天衣寺

萬壑千巖非浪聞十峰雙澗不須論袈裟旋化空王服
宮殿曾招帝子魂山向馬頭回禹穴谿分燕尾入雲門

秋行既了登臨願
草草題詩對綠尊

毅齋鄭祕書道山領客

羣玉堂前春晝陰
主人領客步清深
上方圖畫無真贋
東壁詩書有古今
手轉玉璣看測日
指揮金井試為霖
山翁不作蓬萊夢
但願時來洗此心

元日

長憶兒時二老傍
元正歲歲有風光
攬先禮數修人事
著好衣裳侍酒觴
回首不堪追日月
感情空歎換星霜

尚期我老如親老却看兒童作節忙

重五日懷舊

獨守空庭日欲晡滿斟濁酒不須沽白頭兄弟三年別
青眼交遊一字無醉看葵榴懷舊事饒思櫻筍夢吾廬
向時癡絕今愁絕自讀離騷些老夫

贈番陽程克己

見說番陽有老程與人懷抱亦分明一千里外未識面
二十年間長慕名因聽酒邊談舊事便從客裏定交情

他時我老君猶健海內相逢即弟兄

初聞雷聲

二月寒猶在春雲濕未開
灑窻終夜雨發軔數聲雷
薺麥綠生腦棠梨紅拆腮
西湖花事動從此日裴回

靈巖寺

天柱峯高逼太清靈巖端足擅
高名人間有石皆奴僕
天下無山可弟兄樵徑雪深多
虎跡清溪風暖盡猿聲
客身元是山林種見此如何不
動情

秋夜

小屏相對兩眉攢
長夜迢迢不肯殘
鼠向鐙前窺坐卧
人從夢裏說悲歡
故山無計行秋晚
客路從誰守歲寒
留得濁醪相慰藉
酒腸猶喜十分寬

寄王仲彛仲彛留三衢久不歸省因以箴之

別君三見鴈南飛
夢裏相逢覺又非
書去不知何日到
人來先問幾時歸
正堪燈火觀書卷
莫遣塵埃染客衣
二老倚門知已久
交情於此亦依依

李將

自小在行伍得官因用兵籌邊頭髮豎入陣骨毛輕戰
馬惜如命寶刀都有名酒酣常罵座嫌客話昇平

無錫縣春日

吳楚新歧路江湖舊散人放船來古縣沽酒供閑身花
卸一村雨烏啼千樹春野塘風捲地無復見芳塵

常熟縣破山寺

古縣滄浪外精籃縹渺間木枯曾閱世龍老解分山鳥

道秋迷跡禪房晝掩闕詩成遊子去流水自潺潺

曹娥浦泊舟

夜宿曹娥浦停舟是幾更聞鐘知寺近聽艫信潮生風
向沙頭起天從枕尾明夢回無意緒兩岸杜鵑聲

拜林和靖墓

玉函香骨老雲根占斷孤山水月村薦菊泉清涵竹影
種梅地冷帶苔痕生前已是全名節身後從誰問子孫
惟是年年寒食日遊人來與酌清尊

多景樓

一帶青山欲盡頭
精籃深處著危樓
下無餘地容車馬
上有重欄接斗牛
鴉落野田長趁晚
鴈沈沙渚最宜秋
江南好景從來少
北望空多故國愁

賞心亭

江亭如倚釣魚磯
面面雲欄勢欲飛
西望汀洲依白鷺
東連巷陌接烏衣
六朝更代人何在
千古興亡事總非
客子猶憐風景好
倚闌長是欲忘歸

夜過馬當山

獨載詩書趁野航，自憐漂泊度時光。
殘年淮擬登牛首，連夜匆忙過馬當。
古廟荒寒江浸影，斷崖淒慘石凝霜。
壯懷未分甘哀老，回首長淮恨更長。

江湖小集卷七十四

欽定四庫全書

江湖小集卷七十五

宋 陳起 編

許棐梅屋詩稿

夜泊長河

黃帽貪程夜泊遲
市樓燈火歇多時
滿懷風月無分付
却借漁翁短笛吹

訪潘叔明

一室寬於養鶴籠
秋簾疎透雪花風
怪來几案無寒色

春在題詩卷子中

明妃

漢宮眉斧息邊塵
功厭貔貅百萬人
好把香閨舊脂粉
豔妝顏色上麒麟

醉起

午醉醺醺到日晡
起呼茶盃炷熏爐
隔窗幾點敲花雨
子細聽時却又無

帕子

萬縷縱橫如妾恨一方輕薄似郎恩多時不繫纖腰舞
却對花前拭淚痕

晚泊臨平

晚却風帆泊市橋稅亭民屋總蕭條秦封不到河邊柳
送往迎來枉折腰

元夕後湖上作

自從樓閣罷燒燈未有今朝一日晴暖拆葑邊冰翼破
寒留山頂雪痕輕嬌驄已印尋芳跡小妓新翻鶯唱聲

每箇旗亭商一醉也應排日到清明

沈子壽郊居

屋外猶餘地百弓經鋤知費幾年工
栽蔬少似於陵仲種菊多於靖節翁
偃屈溪山詩卷裏破除風月酒杯中
近來又喜禪機透一顧叢林萬袖空

贈葉靖逸

借得城居一丈寬五車書向腹中安
聲華馥似當風桂氣味清於著露蘭
朝士時將餘俸贈鋪家傳得近詩刊

回首舊隱西湖上誰伴沙鷗度歲寒

鄭介道見訪

步頭楊柳種多年今日方維勝容船掃石共看山色坐
枕書同聽雨聲眠溪羹旋煮蓴絲滑野飴新炊芡玉圓
不管歸心忙似箭強留吟過菊花天

贈龔彥質

慈湖分與半窗燈照得襟懷徹底明

得一作出
一作清

蒲座夜

閑猫占卧筍輿春暖鶴隨行爐香欲盡經猶誦硯墨才

濃句已成歲晚弟兄俱白首一樓風雨話深更

題常穆仲蘸碧

舫樣一亭小依山復靠池每來分席坐須憶下湖時竹
弄當窻影花添蘸水枝人間風浪惡泛宅幾天涯

趙叔魯

天上除書絡繹飛謫仙何事得來遲旅懷寬似居家日
學力高於未第時山帶晴霏橫畫軸水流清響入琴絲
世間多少王孫貴無我寒泉一句詩

秋江漁父

小舟輕似一鷗飛，戀月隨風慣不歸。
困卧蘆花深雪裏，夜來添蓋舊蓑衣。

山間

趣得山間筍蕨春，借厨烹煮自吹薪。
倩誰分我杯羹去，寄與中朝食肉人。

木山父書院

占得文房一丈強，地幽雖夏亦清涼。
瓶花誤倒水侵案，

書葉亂掀風滿床
薜長密藤遮半壁
桐分疎影出低牆
客來莫道無供待
只啜茶甌却味長

蠟梅江梅同瓶

苗裔元從庾嶺分
兩般標致一般春
淡妝西子呈嬌態
黃面瞿曇現小身
不羨腰金橫玉貴
來尋嚼蠟飲冰人
只愁花謝香狼藉
桃李如何接後塵

贈畫魚沈秀才

寫字摘文不療饑
生涯換得頗新奇
錦心暗織臨淵網

蓬鬢潛纒釣雨絲落筆易於投餌處得錢多似出罾時
漁翁枉占煙波濶不及君家小硯池

贈北磻

天下名山行脚遍依然形影瘦伶俜支吾寒暑袈裟耐
變眩煙霞筆硯靈對客敬如堂上佛讀書通似藏中經
石頭路滑終難到不是詩禪莫扣扃

雪晚

臘雪連宵接曉飛錦衾公子未曾知起來攜杖敲梅樹

扶得輕盈壓損枝

閨怨五首

眉鎖從春不整開
懶移心事向妝臺
恩情恰似殘花片
去逐東流更不迴

別後相思瘦玉肌
不堪重著看花衣
恨君得似梁間燕
社日辭家社日歸

月引庭花影上窻
悶和簪朶卧空床
春寒翠被無人共
閑却熏爐一字香

離愁一點濃如黛強把金篦掃不開新月幾番呈巧樣
薄情夫婿未歸來

小院東風去住中春愁元不隔簾櫳自家顏色凋零盡
却對花枝惜墮紅

枯荷

萬柄綠荷裛颯盡雨中無可蓋眠鷗當時乍疊青錢滿
肯信池塘有暮秋

庭樹

今年庭樹著花稀，因是耽書失事治。
何處結巢雙喜鵲，却來刪得幾枯枝。

春晚

推得詩編把酒斟，挽春佳句讓鶯吟。
門前却喜無人掃，積得殘花一寸深。

贈臨上人

逸湖山疊翠師住，最高層野偈書林。
葉茶鑪煮澗冰松筠為道友，日月是禪燈。
儻許分峯隱，甘為有髮僧。

客路

客路久驅馳秋深兩鬢知
田家投夜宿漁竈寄晨炊
契分燈前影生涯索裏詩
遙憐故園菊荒草沒霜枝

鍾雋卿見訪

荒圃知非延客地謾分苔石坐移時
杯中淺注三行酒
几上同看數板詩樹未經霜飛葉早
菊因閏月放花遲
自無景物留君住却恨西山日半規

題倦庵

自扁庵為倦斯名恐未然醉巾頻漉破遊屐幾磨穿新
種竹都活舊栽花更妍門前春水漲催發孝廉船

贈元耘軒

白髮蕭蕭客帝都故園閑却種瓜鉏平時不信為儒誤
今日方知涉世疎煙浦未尋歸去艇雪窗猶讀借來書
詩名歷盡江湖客要在唐人向上居

題吳叔清郊居

哦松未了賦歸歟旋買田園結草廬數畝竹陰惟欠鶴

半池山影不妨魚舉杯多是沽來酒插架無非讀過書
我已倦為都下客願君分與把茅居

書郭子度壁

禁苑精廬是切隣衣巾雖舊不沾塵鐘魚聲裏吟連曉
花柳香中醉過春和土重泥燒藥竈買絲新接釣魚綸
遼湖十萬人家住如此清閑有幾人

鴈字

點畫分明印碧空迴鸞返鵲勢差同月邊映得銀鈎體

雪裏摹成玉箸工
斷續似經秦火後
悲涼如在楚詞中
愁人筆硯俱荒廢
倩寫相思寄便風

宮詞二首

卧聽羊車輓夜雷
知從誰處燕酣回
蟾光也解君王意
隔箇簾櫳不入來

同入宮來幾許人
因何遣妾護長門
雲鬟半脫香腮瘦
却愛菱花鏡子昏

古墓

石人猶自立
蒿萊拂讀殘
碑字字哀
隣冢已澆
寒食酒
野風分送紙錢來

憶鄭元甫

別後黃花兩度殘
天涯彼此寄書難
幾行鴈字斜陽裏
聊當平安一紙看

贈芸窻

能書能畫又能詩
除却芸窻別數誰
只是霜毫冰蠟紙
才經拈起便新奇

戍婦詞一首

半落釭花午夜閑
戍衣裁就寄君難
鴈來不帶平安字
却帶邊風入帳寒

贈陳宗之

六月長安熱似焚
鄜中清趣總輸君
買書人散桐陰晚
卧看風行水上文

傷春曲

日日望郎郎未歸
玉肌寬盡縷金衣
春心撩亂強拘束

碎剪紅綃補舊枝紅綃才向枝頭住殘花又逐東風去
願花飛入笑筵中莫入愁人斷腸處愁人見花人自羞
花見愁人花也愁花飛有盡愁無盡柳外一聲黃栗留

四時宮詞各一首

因見落花心覺悟薄羅襟上淚痕乾容顏縱似花枝好
能得君王幾日看

碧玉涼梳落枕邊懶梳雙鬢學新蟬恩情不及班姬扇
縱是炎天亦棄捐

涼夜誰同玉簟眠
湘波冷浸一枝蓮
君王不學中秋月
處處分身處處圓

雪壓殘門消未盡
夜衾堆盡舊宮羅
鴛鴦瓦下垂冰筋
未抵思君玉筋多

郭評事

廷評滿腹貯陽春
筆下從來活幾人
廳小似分幽寺住
俸輕如在舊山貧
堆書教子猶疑少
倒屣迎賓不厭頻
欲效林宗巾角墊
自憐雙鬢有紅塵

挽吳春伯

入門諸子哭寒衣痛說嚴君屬纊時
病重刀圭難作效家貧衾舍不如儀
從春屢有登臨約近日方無唱和詩
執紼南屏山下路悲風吹亂綠楊絲

挽郭子度

連年染患貌槁黃盧扁猶無起死方
穉女自敲尸畔磬隣僧來炷佛前香
生涯謾有千書卷受用惟存一奠觴
聽說茶毗心更苦拭乾清淚又成行

寄吳宜之

文公徒弟無多在學術應如壽數高好句先教諸子和
墊巾翻被俗人嘲湖邊茶店共誰坐井畔柴扉欠我敲
昨夜相思眠不穩月眉斜印落花梢

瑛上人

十二三時便出家何曾頃刻離煙霞晨持數卷日方上
夜梵千聲月未斜洗鉢不經鷗浴水插瓶嫌採蝶殘花
儒冠誤我駸駸老何日蒲團共結跏

木芙蓉

芙蓉豔金谷秋色錦機中
霜樹不知醜葉與花爭紅

東歸道中

芙蓉波面出罾魚
廉似城中買擔蔬
欲試膾刀還不忍
恐傷千里寄人書

籠禽怨

千金新購入雕籠
恨在嬌聲斷續中
昨夜羈雌何處宿
落花殘月故巢空

破鏡詞

寶鏡一從分破後不堪磨拭照妝鈿倩誰攜上青雲去
補得今宵缺月圓

龔彥質怨可二丈

兩龔當暑客秦溪旋買黃練替熟衣想見西湖風月裏
藕花凝望載詩歸

張聲父

城中破屋妻兒住自向招提借小房壁上碑文皆古篆

案頭書冊半仙方月嫌碎竹遮窻暗風款飛花入座香
點檢未如僧相處只多髭鬚幾莖霜

秋齋即事

桂香吹過中秋了菊傍重陽未肯開幾日銅瓶無可浸
賺佗饑蝶入窻來

泛剡

水濶無風似有風蘆花搖落櫓聲中鷗無一點驚猜意
認作當時載雪翁

醉歸

半醉歸來卧不成，月華流彩爛中庭。
茶鐺凍結香匱冷，只把梅花嗅得醒。

湖上曲

新晴旋蠟遊春屐，半濕香泥恰好行。
琢得小詞腔未穩，往來花下怯歌鶯。

趙野雲

載雨駕雷翻覆頃，漏星藏月卷舒間。
若將雲與詩人比，

政恐雲無日日閑

古硯送趙明府

一片端州古硯甄翁孫相授當良田寒梅磧下和冰洗
秋桂窻前滴露研學字不工空費紙吟詩雖苦未成編
贈君攜去薇花畔草詔閑時枕匣眠

戲題花片

一片落花題一字湊成一首怨春詩縱橫貼在窻紗上
巧似迴文織錦時

寄衣曲

蘆花風緊鴈飛飛，便寄邊衣也是遲。
妾把剪刀猶覺冷，況君披甲枕戈時。
願君百戰圖勲業，敵項殲羸頻獻捷。
博取貂蟬金印歸，無負君王無負妾。

畫眉曲

日印花枝欲滿窻，旋磨鸞鏡試新妝。
恩情只似春宵短，眉黛空如柳葉長。

宿閑林步

山禽棲定澗蛙鳴時復鷓鴣臬雜數聲昨夜酒添春睡重
幸無憎愛到天明

宮女詞

妍醜三千衆恩情一例輕妾身雖寂寞天下却升平

真珠園

芭蕉葉上題詩字雨後來看半不全餘濕未勝濃墨補
且攜卮酒到花前

湖邊

湖邊開到木芙蓉，攘盡荷花十里紅。
紅蓼莫慙顏色淺，榮枯同是一秋風。

讀南嶽新藁

春來遊未遍湖山，已是風光一半殘。
細把劉郎詩讀後，鶯花雖好不須看。

花

牆頭新露一枝紅，壓盡隋人萬綵工。
香豔便棲雲鬢老，也勝飄泊晚西風。

別友

分付離觴莫滿斟
酒深還與恨同深
自憐不及春江燕
一路相隨伴好吟

不語僧

默坐蒲龕若塑成
客來惟聽小鐘鳴
却嫌庭樹無禪力
時有風枝雨葉聲

孔海翁

鑑湖湖上寄閑身
好景應同賀監分
梅下有船供載雪

荷邊無地可鉏雲吟人多倩刪詩稿名士爭求作序文
畫卷書編藏滿屋其他生計盡輸君

題縣樓呈丘竹坡

令君聊試棟梁材結就譙樓亦壯哉疑是海宮新湧出
不然仙府乍移來無人敢帶私心入萬戶皆知正道開
細數代瓜能幾日曉籌昏鼓莫相催

寄題竹坡

郭外移來費俸金幾年擡舉玉成林更無餘地栽閑樹

儘有高枝著卧禽寒影似傳東野貌清聲如寫伯夷心
呼童少殺青瑤簡染月濡雲寄我吟

數椽

數椽茅屋傍林塘幽似山僧獨住房夜靜只憑猿守宅
晝閑時有鶴升堂旋收落葉供茶爨細搥枯花作印香
書冊滿床詩滿橐別無生計亦何妨

送友人為僧

知心朋友雲霄裏三尺官綾取不難禪衲乍披身愈瘦

儒冠新脫頂微寒
數編詩稿聊收起
一藏經文旋取看
惟我塵緣推不去
蕭蕭華髮倦漁竿

地爐

穴地為爐了一寒
肉屏氈帳任無緣
晨燒樹下沾霜葉
夜煮山頭瀉月泉
已借陽和歸故絮
更分光燄到殘編
百年貧富灰埃盡
荒冢累累野燒邊

春雪

東風吹雨作花飛
寒勒芳程幾日遲
惟有庭前老梅樹

謝渠添補落殘枝

挽沈晏如

不信詩人一例窮如公半世又成空
湖邊便欠尋梅友
籬下應無采菊翁
雪片堆平閑藥竈
雨聲敲碎舊漁篷
墓銘吟稿兒封寄
血淚斑斑浣紙紅

贈相士

澗水溪冰似鏡清
自看寒貌已分明
煩君別相江湖友
來歲誰魁淡墨名

陳裕齋墨戲

臨帖鈔書外尤深破墨工萬峯千嶂趣片紙尺綃中雲
暗孤村月潮生滿樹風自嫌吾已老摩硯一無功

題吳秋潭隱居圖

到處有茅堪蓋屋誰家遷槿不成籬秋潭何事經營晚
應是無人會買詩

題摩雲 悟師

老松陰下訪摩雲仰望青雲隔幾塵不是倚空梯百尺

只緣中有道高人

田間

田間久不到草木半蕭疎
鷗占沉舟浴蛭分破壁居僕
溫攜到酒隣送賣殘蔬未說催租事黏窻且讀書

題埜處

數畝家園枕碧波樹桑疎處補花窠
簷低不礙儒冠入橋矮才通釣艇過
雲笛旋栽門外竹雨衣新織檻前莎
有時牛背看書罷一曲春風甯戚歌

孫祺卿新居

幾年銖累束脩錢才向湖邊置一廛種竹庭深難得月
養魚池小易為泉山呈好畫當書案柳撒輕絲罩釣船
酒力半酣詩思倦矮床相對白鷗眠

招高菊澗

時在縣齋

歸買秦溪屋一間才如都下僦樓寬門前養草如花賞
壁上黏碑當畫看自改舊詩多未穩獨斟濁酒不成懽
髯仙只在淵明宅泥濘相邀寸步難

李明府雪中小閱

令君蒙雪教千兵一點妖氛不敢生和氣旋回弓力軟
寒光微映劔花明民居似倚銀城壯海道如鋪玉簾平
入蔡歸來方夜半畫堂歌管未收聲

西真圖

翠水池邊宴早秋雲謠聲裏月西流醉歸不信乘鸞穩
却擘蓮花蕩采舟

書北庵門

十度來敲九不應
隔離空見竹青青
不知池裏黃金鯽
聽講楞伽幾卷經

贈術士張癡

伶俐不如癡
從來我亦知
財吟詩好日
便是命窮時
鼠笑釜無粟
蝸嫌壁有碑
五行修得否
髭鬚已絲絲

謝毓齋李尚書惠詩序

綠野堂邊種藥成
已斑髭鬚復青青
謝庭子弟皆英物
漢殿公卿半學生
爭捧溪藤求妙畫
競磨崖石乞新銘

如何海角孤吟者文集中間也掛名

葉克齋

歛浦租船只載詩一廉如此似君稀
雙親猶道行裝重
多帶羅紋一硯歸

題趙子固春山上寺圖

望得招提見程猶半日間馬嘶曾到處
僕指未行山風
遞松聲遠雲連草色閑何如添箇我
坐石聽潺湲

湯婆子

一冬專寵道人房不藉華清賜浴湯
皤腹却無璋瓦分矮身難稱綺羅妝
春生蝴蝶半床夢暖迫梅花一帳香
醉倚肉屏君莫羨北邙多少黑頭郎

送寫神李肖巖入道

一制塵緣去學仙鶴程風露漸高寒
白玉樓中逢鼻祖為傳吟貌寄予看

寄趙倉

麾節交迎出帝城滿朝皆羨板輿榮
一州暫輟春風暖

八郡同瞻霽月明
吳苑鶯花新管領
秦溪桃李舊生成
應憐倦卧寒窻者
煮藥爐邊聽雪聲

送趙子梁

梅福舟行速離觴不暇斟
雖然交日淺頗覺別情深
宿處鴈相伴到時鶯對吟
水心新冢下替我一沾襟

得閑亭

柳風雖小絲絲裊
花雨無多點點香
惟有吟毫閑未得
染紅濡綠一春忙

題錢慶豐醒庵

不向杯中物吟邊僅有君自無沉醉分非效獨醒人捲
箔進明月開門放宿雲揀茶敲未遍又摘露芽春

挽周倅

真是分風月歸來無俸錢人皆唾拙宦天又嗇長年舊
宅寒潮外新塋古樹邊一詩哀不盡簷雨對潸然

上趙蘭坡

身迫雲霄自不知只如師友講論時驅龍駕鳳陽冰字

剪月裁霞太白詩
雨院炷香熏畫卷
晴窻添水浸花枝
十年漫走江湖上
只尺蘭坡却到遲

上嘉禾趙守

邦君一念只寬民
真箇龔黃現後身
和氣蒸為千耒雨
暖雲裁作萬襦春
座中長有清吟客
庭下渾無健訟人
諸郡盡能依此樣
世間那有一家貧

劔言

朝潤郵支膏
暮澤樓蘭血
何如沉土中
蝕為無用鐵

題常宣仲草堂


隔市能幾步幽趣踰山林鑿池小如斗水淺魚自深簷
任樹枝礙堦從草色侵不肯一鋤斫恐傷春風心朝出
貨仁義暮歸炊古今客來無可款石鑪添水沉

題張俞仲竹屋

削成千竈簡此屋是餘材長有清風至渾無俗客來猿
當吟案立鶴趁釣船迴添足歲寒計栽松復種梅

李方庵款梅

梅花惆悵三年別香鎖空庭幾風月今年花發主人歸
依舊主人貧徹骨小枝分立硯屏邊無酒酬春燭焰寒
數葉殘書繙未了喚起山童敲鳳團



江湖小集卷七十五

欽定四庫全書

集部

江湖小集卷

七十六至
八十一

詳校官中書臣張杓成

助教臣常循覆勘

覆校官主事臣龔敬身

校對官助教臣胡子襄

謄錄貢生臣李 燾

欽定四庫全書

江湖小集卷七十六

宋 陳起 編

許棐融春小編

開爐十日併當融春小室為六藏計亂書中得舊稿
數紙稿自甲午至己亥詩不滿三十更散失不得傳
則與日月俱棄矣併綴數文為融春小編非千金弊
帚實尺璧餘陰也梅屋許棐題

樂府

妾心如鏡面一規秋水清郎心如鏡背磨殺不分明
小窻寒燭夜結紐綴郎襟不結尋常紐結郎長遠心
郎身如紙鳶斷線隨風去願得上林枝為妾縈留住

題舒王遊半山圖

驢載新詩僕抱書松聲禽語當傳呼不知邂逅耕田者
問著青苗免役無

題錢叔恭立齋銘後

蔣魁作銘

拄義撐仁難著脚十人著脚九斜欹此銘不特為君助

今古儒家砥柱碑

舊漁竿

掣斷江湖幾線風
蓑衣閑掛餌瓢空
何因獻入君王手
持向磻溪釣太公

草履

江湖蓑笠舊交情
石滑泥深步轉輕
恰是革華蹤跡嶮
官程高處越難行

贈劉相士

滿鏡秋霜鬢影寒，此生堪笑復堪憐。
煩君只相看書眼，更對青燈得幾年。

宗之惠梅窠水玉牋

百幅吳冰千葉雪，對吟終日不成詩。
憶君同在孤山下，商略春風弄筆時。

月澗惠硯滴梅腦

手不題詩已半年，硯磚相伴學枯禪。
為君蘸濕元暉筆，寫出江山雪後天。

踏雪尋梅興未償
衣襟賴有隔年香
銅匱更炷冰花腦
不到孤山也不妨

春思

嫁得蕭郎不戀家
幾年流落在天涯
滿懷多少傷春事
嫵殺門前叫賣花

送趙丞

汝諤

竹梢風露松梢月
未抵吟丞氣味清
笑問兩年何所得
錦囊詩重俸囊輕

贈墨僧

老硯磨穿事不成，萬書堆裏鬢星星。
願隨君去柯山下，收拾殘烟寫佛經。

重陽乏酒

黃花冷笑竹籬邊，笑我床頭乏酒錢。
帶雨折來無用處，碎掇金屑和茶煎。

燭

長身夜占銀臺立，焰焰光搖頂上珠。
貪向華堂照歌舞。

不知灰得寸心無

代術者言

不聞沸鼎烹夷叔那有雲臺畫四凶
自與心君消息了却將甲乙問窮通

贈錢相士

我貌君容一種寒鷺漂鷗泊廿來年
我詩吟就無人買君相公卿煞得錢

觀松巖畫卷

老屐相隨四十年慣看蒼翠聽潺湲今朝細玩松巖畫
猶有行吟未到山

吳江道中

一別吳松二十秋敗荷枯柳總新愁白頭交友凋零盡
賴有寒江幾箇鷗

題陸宣公堂

一編奏議從頭讀句句冰聯玉綴成不是德宗嫵坦直
自緣唐室未升平諛魂盡逐殘星滅義魄長隨霽月明

我亦愛君憂國者歲時來一拜先生

送趙蘭坡

弟判嘉興藹政聲蘭坡尤又出專城如將天上一蟾影
分作人間兩郡明江冷雪隨帆幅去路晴梅夾轎牕行
開藩便拜歸班詔也與玉山添重名

題趙恕可山臺

繞宅無非卷畫山吟臺更對好峰巒錦囊低掛花梢上
玉子輕敲竹廡間小硯買來猿解捧異書編就鶴同看

主人出赴功名會
澗水自清雲自閑

小蓑道人

滿面瘡痍癩胸中一泓雪
醒吟鶴背風醉卧鷗邊月
不賣嚇鬼符不試燒金訣
笑問舊蓑衣秋來添幾結

題丘竹坡新第

長安富貴海十客九倦還君去不著意君歸無愧顏
舊圃一二畝新居十數間
花尋直樹種竹簡斜枝
刪詩句滿壁寫書編
到處安冬簷日春煖夏戶風
晝寒不是時

令舛自緣心地寬天下多政事未須牢閉關

題雪林畫卷

亂灑春霏著紙寒玉成天地片時間有人諳盡江湖冷
却愛尋常卷畫山

送旦上人序

詩曰琴瑟友之東萊謂無時而不在側若朋友然故曰
友今士自時文之外無學不仇何止牙夔庭戶草深三
尺哉山僧野道間或習琴亦未能以友友也旦上人禪

外一琴朝携莫款調合而氣同子謂若師者始可與言
琴之友矣師曰言友琴者惑也言不友琴者亦惑也言
友琴不友琴皆惑者尤惑也海上有子春先生吾為子
往而問之遂抱琴而去

巫說

小人倚巫為命一人疾闔衆走巫以巫之在不在候吉
凶以神之降不降驗生死巫在衆喜神降衆益喜降曰
某有某罪某崇崇之祀可贖也衆諾雷應惟恐瘠酸不

嗛其饗疾瘳重謝巫不瘳不巫責也梅屋居士曰我命
在我不在天而在神乎不在神而在巫乎蓋其中心有
愧愧則疑疑則亂亂則邪入矣邪則病病則懼懼則妖
興矣邪入妖興而命在我乎命不在我禱猶詛也生猶
死也巫小人之尤也不可倚也作巫說

跋四靈詩選

藍田種種玉簷林片片香然玉不擇則不純香不簡則
不妙水心所以選四靈詩也選非不多文伯猶以為畧

復有加焉嗚呼斯五百篇出自天成歸於神識多而不
濫玉之純香之妙者歟芸居不私寶刊遺天下後世學
者愛之重之

跋臨上人所藏東坡像

平生所見坡像此筆最凡宛然閭里一翁耳那稱如許
文章學問然文章學問崇坡一生流離萬狀安得如閭
里翁優游終老不識半點榮辱邪

跋劉季必畫冊

讀東坡石氏畫苑記每恨不見其畫此劉氏畫苑惜東坡不及見之

題松巖所惠雪屏

一玉千山化工之無盡春也為山寫神筆端之無盡意也揭之梅屋往來者之無盡觀也

寫真自贊

人道女不似我我道別無人似女似我非森森千丈松之精神不似我也非濯濯春月柳之標度似不似皆得

人憎然亦有一些好處好處是今人衣冠苞著箇古人腸肚

跋竹軒乞藥帖

茄不上貴人盤飴賴有山僧野道閑肚皮安著不感德而反以為崇誠蔬中之小人也

書先祖監丞手澤後

翁年踰從心猶鑽燈下細字諸父懼非老人所宜又不
敢明諫一夕令棊粟翁寒漏下幾刻矣請歸寢翁解意

曰吾不愈於埋沒富貴達旦歌舞遺鳩兒孫者邪垂誨
四十年洋洋如昨日語真吾家之韶音也

硯志

此硯雖未佳而愛踰金玉者以先君舊物也先君游宦
章貢人硯俱亡後三十年硯歸於棐惟夜臺茫茫人無
歸日哀哉痛哉然能朝夕摩滌寫先君胸中未吐之書
人硯俱不亡矣

江湖小集卷七十六

欽定四庫全書

江湖小集卷七十七

宋 陳起 編

許棐梅屋稿

已亥至癸卯詩不滿二十首甲辰一春却得四十餘篇疑詩之多寡遲速似有數也天或壽予予詩之數固不止此然當以貪多務速為戒梅屋許棐題

蘭花

竹底松根慣寂寥肯隨桃李媚兒曹高名歷盡離騷卷

不入離騷更自高

郭南湖見訪却適有出一絕為謝

一篷風雨偶歸遲
見說君來扣我扉
童子困眠梅樹下
不曾放得鶴雙飛

枯樹

幾年柴立荒塍下
春雨秋風總不知
一點陽和到桃李
紅紅白白便盈枝

錢謙齋新居

住破吳松江上屋杭州城外結新廬未尋陸羽烹茶具
先借淵明種菊鉏山入樓中成好句月來牕下伴殘書
御街車馬無行處誰肯抽身覓退居

上趙克家太守

說著嘉興太守賢野梅官柳亦歡然貧民不識重租苦
老吏難將一事瞞但有詩書堆几上更無歌舞到樽前
凡為郡者皆如此天下何由不治安

趙宰瓊花圖

詞下靈根無別種凡花誰敢鬪榮枯被君分種鵝谿上
從此人間有兩株

寄照鏡潭

鏡潭炯炯秋無底著一纖雲也是多禪外當無些子事
如何猶有作詩魔

茉莉

荔枝鄉裏玲瓏雪來助長安一夏涼情味於人最濃處
夢回猶覺鬢邊香

題猗綠堂

蕭蕭萬竿玉深護讀書堂夢趁秋聲薄詩攬夜色涼敲
茶風遞響滴硯露涵香不雜有花樹花紅不久長

趙山臺寄詩集

海鴈叫將秋色去山臺抄寄好詩來菊花過了梅花未
自有花從筆底開

寄題東津

東津占得江山勝安頓亭臺到處宜夜夜中秋明月影

朝朝寒食好花枝長牋短軸真行字舊軸新編倡和詩
只隔一潮飛不去悵懷惟有白鷗知

寄友

已奏春班名字了不妨閑作幾時遊家僮未要裝詩擔
見說三高索唱酬

紅梅

不堪冷照黃昏月強倚春風作杏粧雖得容顏暫時好
欠他肌骨舊來香

迂張宰 堯章

倦骨畏寒如畏虎可曾一步出柴扉因迎令尹西郊外
折得梅花滿把歸

謝施雲溪寄詩

折得桂花三數枝雲溪又寄幾篇詩詩香入在花香裡
韻似龍涎火煖時

右己亥至癸卯詩

餞梅

十日九風雪羞見今春寒梅花辦歸計一點心欲酸所
秉太孤潔有此末路難來年復相見一笑賀平安

築城曲

日將西杵聲急一聲聲自死腸出城高不特土累成半
是鋪填怨夫骨儒坑戰地骨更多十二金人隨鬼泣

烏夜啼

丈人屋侵雲烏愛丈人屋涂人亦愛烏烏聲喜相續屋
底間蛾眉環坐理絲竹絲竹無新腔寫汝聲為曲丈人

一賞音瓦礫棄珠玉移噪隣翁家聞者皆唾逐

馬塍種花翁

東塍白髮翁勤樸種花戶貧賣有根花價重無人顧西
塍年少郎荒嬉度朝莫盆賣無根花價廉爭奪去年少
傳語翁同業勿相妬賣假不賣真何獨是花樹

泥孩兒

牧瀆一塊泥裝塑恣華靡所恨肌體微金珠載不起雙
單紅沙厨嬌立瓶花底少婦初嘗酸一玩一心喜潛乞

大士靈生子願如爾豈知貧家兒呱呱瘦如鬼棄卧橋
巷間誰或顧生死人賤不如泥三嘆而已矣

染絲上春機

染絲上春機春濃絲色淺妾心隨梭飛郎心如軸轉
染絲上春機錦成貴無價不忍裁成衣怕剪鴛鴦破

長門怨

妾身如蓮根沉埋淤泥底雖有白玉姿無人為拈洗
妾身如亂絲卷藏箱篋底願如鴛鴦錦無人為分理

秋風辭

颯颯秋風來一葉兩葉墜燕子動歸心薄情知也未
颯颯秋風來衣衾愁未整莫作閨中寒且作天涯冷

三臺春曲

昨夜微風細雨今朝薄霽輕寒簷外一聲啼鳥報知春
柳平安

春是人間過客花隨春不多時人比花尤易老那堪終
日相思

蝴蝶飛

蝴蝶飛蝴蝶飛紅邊迷了紫邊迷粉老香乾何處歸不
學蜜蜂做家計勤苦之中有甘味

破琴

幸逃煮鶴烟枯羸卧烏几向來千萬音今在何人耳舊
譜傳不真零落幾張紙瓦缶空雷鳴牙夔喚不起

破硯

碌碌礧礧間得此一雋石磨我三十年貌鰥雙鬢白渠

亦苦我磨眼穿流淚墨老蟾在傍笑兩窮自相厄

對鏡詞

烟護杏腮寒日襯桃腮暖惟有鏡中花東風都不管

織錦詞

綵絲愁緒雜春機
咿嘍聲中日又西
織到花枝連理處
玉驄門外一嬌嘶

母忌

一別音容歲幾更
紙灰飛盡淚猶傾
最憐春雨相將足

綿上有田誰共耕

春思

朝來一陣無情雨
敲得庭花已半殘
燕子不知人冷落
飛來簾底避春寒

春雨

老來慵把種花鋤
片紫纖紅一任無
不忍今春孤負雨
自收簷水浸菖蒲

燕

處處亭臺燕好春
唱花歌柳調爭新
梁間不用多言語
回耳聽君有幾人

石菖蒲

一碧生涯水石濱
縷風絲雨瘦精神
前身恐是巢由輩
怕著人間半點塵

草

生長冷階閒砌畔
一春知見幾花飛
雖霑雨露無多子
却到秋來綠轉肥

不是東風有愛憎為憐微細頗加情胚紅孕紫寧交晚
且放青青寸草生

池魚

深淺生涯足浮沉世念輕莫貪鈎上餌去作鼎中羹

柳

青青得意春三月撩弄東風舞腰活莫道長條舞得多
長條先被行人折

小盆花

小小盆中花春風隨分足花肥無賸紅葉瘦無欠綠心
傾幾點香也飽遊蜂腹太盛必易衰荒烟鎖金谷

花願

未到無生無滅地聊為春風露紅紫不願隨風趁蝶飛
願就枝頭抱香死

諭柳

不須嬌逞舞腰枝不須巧畫宮粧眉只把千絲萬絲結
結住行人無別離

選官圖

排銜累職甚分明除罷皆由彩色行縱有黃金無好采
也難平白到公卿

猗綠惠燭

剪剪春生萬卷堂一花知勝幾螢光癡兒不識半行字
只解高燒照海棠

落花

落花傳雨五更風能旁亭臺幾日紅把似匆匆又飛去

不銷裁染費春工

落梅

紅杏枝枝嬌似染
綠楊處處密成圍
苦無顏色相追逐
自趁東風作雪飛

贈壽醫師

寓雷峯

軒窗開處總湖光
誦罷難經納晚涼
雨濺荷香沾古衲
月移松影罩禪床
燃燈就取燒丹火
煮藥先留淪茗湯
二豎三彭都見佛
人間無病亦無方

陳宗之疊寄書籍小詩為謝

江海歸來二十春，閉門為學轉辛勤。
自憐兩鬢空成白，猶喜雙眸未肯昏。
君有新刊須寄我，我逢佳處必思君。
城南昨夜聞秋雨，又拜新涼到骨恩。

簡齋詩一
涼恩到骨

送趙竹潭

已強詩仙一夜留，任教侵早放船休。
恨身不似梅花片，飛入寒篷伴遠遊。

贈僧虛中

僧趁雪到前梅花猶恨遲
略譚殘歲夢使和早春詩
儻鴈依船宿寒猿捧硯隨
吟單未須捲重見是何時

右甲辰一春詩詩共四十餘篇錄求芸居吟
友印可槩皇恐

江湖小集卷七十七